



nyamu cia gĩthaka



hĩa na kanya ka mbakĩ



mũhuhi wa rũhĩa

Mũgamb

Wa Kĩrĩnyaga

007



Mweri Wa Mũgira Njara



Maratanya atĩ mũcemanio ũcio nĩ ũkanyitithania ciama ikũmi cia ũteti

MŪCEMANIO MŪNENE WA KŪNYTTANĪRA HARĪ NA KĪRĪGĪRĪRO- K ŪU LIMURU

MARTHA KARŪA MEENA KĪONI MARAIGA NĪGWETHA ŪRŪMWE NA ŪIGŪANO WĪNA MWEREKERO.



Kũnyitanĩra kwa rũrĩrĩ harĩ na matanya ma andũ oothe mateithike nĩ kwe-ga, no kũnyitanĩra kwa atongoria nĩgetha marore maũndũ mao, nĩ kwiyenda na gũcokia bũrũri na thutha.

Martha Karua, manyitanĩire na Kĩoni nĩ makoretwo magĩcemanĩa thikũ nyingĩ, makĩbanga ũrĩa mũcemanio wa mweri ikũmi na mũgwanja kũu



Limuru ũgakorwo mwe-ga na wĩ na umithio.

Maratanya atĩ mũcemanio ũcio nĩ ũkanyitithania ciama ikũmi cia ũteti irĩa igakorwo ciuĩte gitarũ kia gatagatĩ.

Magakorũo makĩarĩrĩa mathĩna marĩa makoretwo na andũ aingĩ a Mt Kenya ta arĩmi, aruti wĩra, arĩa matarĩ wĩra, kinya andũ a biacara.

Marauga atĩ nĩgũkoretwo

na mathĩna maingĩ na no mũhaka meethe mũtaratara ũrĩa ũgũtũma gĩcigo kũu gĩthĩ na mbere.

Maroria andũ aingĩ magekinya kũu Limuru nĩgetha materete ndeto cĩa ũthii wa na mbere.

Martha Karua meena Kĩoni maraiga nĩgwetha ũrũmwe na ũigũano wĩna mwerekero.

Gũkũ mũgambo wa Kĩrĩnyaga tũgũtaanya mũcemanio ũcio ũgagĩkorwo wa umithio mũnene na makĩria wa kũnyitithania mũingĩ woothe tondũ bũrũri ndũngĩthĩ na mbere andũ matarĩ na ũrũmwe.

Mwandiki ni Kago Wa Kibe

Mwanĩki Muoria.



K i u m i a
gũukite...

Mwaniki Muoria arĩ mwandĩki mũnene ũrĩa wandikaga "Mũmenyereri" ngathĩti irĩa yaragia ũhoro wa ũrũmwe wa Africa na kwandĩka ũhoro wa Jommo Kenyatta, na ateti aingĩ Rĩria mwandiki wa Mũgambo wa Kirinyaga mararagia na Ngugĩ wa Thiong'o, nĩ arakumirie mwandĩki ũcio ũtakariganĩra.



Mũgunda wa mbimbi

Rĩria mwaũrandũ ambĩriirie kũmĩa mbimbi undũ ũcio nĩ wamũmakirie na ũkĩmũtanga ngoro mũno kũreka mbimbi ta thenge?


Page 04



Douglas Wanyanga

Mũthuri mũkũrũ wa miaka mĩrongo mũgwanja na ĩtatũ (73) wĩtagwo Douglas Wanyanga onete gĩcanjama

Page 02



NJOHI NI NJOHI

Njohi cia ibango rĩu nĩ ĩmakĩtie andũ aingĩ nĩ ũrĩa ĩtete mĩcĩi mũingĩ na ĩkanina imwana ona ĩtarĩ maciaro.

Page 06

President Ruto, nĩ agĩriire akaane mũgũnda wa Ndabibi ota ũria akanire rĩria Matiangi etirwo Parliament aheana ũtonga wake. P.2

Gĩthakuinĩ Kĩa Ngũgĩ Wa Thing'o. P.07.

Rũgano rwa ndabibi P. 2

Cũcũ Wa Kĩũra P. 5

RŪGANO RWA NDABIBI: HIHI RŪKAHANA TA RŪRĪA RWA LAZARO NA GĪTONGA?

NĪ KŪRĪ WATHO UGĪTE ATĪ MŪNDŪ ANĠĪKARA MŪGŪNDA WA MŪNDŪ ŪNGĪ MĪAKA IKŪMI GŪTHIE NA MBERE, ENA KĪHOOTO KUGA ŪCIO NĪGUO MŪCĪI WAKE. (NA GITHŪNGŪ WAATHO ŪCIO WĪTAGWO "ADVERSE POSSESSION RIGHT" WHEN THE TITLE HOLDER FAILS TO TAKE ACTION WITHIN THE STATUTES OF LIMITATIONS)



Arĩmi arĩa anyinyi o arĩa mainaga rwĩmbo rŭrŭ
Tŭgokĩra tene, tŭgokĩra tene
Tŭgathure Ruto Tŭgathure Ruto
Ngai! baba Kaĩ mwagarŭrŭkirwo



Kaĩ kŭu Ndabibi kaĩ kuoneka atĩa
Githĩ ti mwaũrandũ watŭninĩra ithaka
Nĩahĩtwo ĩ nĩahĩtwoĩ ĩ ndaga...cinine

President William Ruto nĩwe o ūmwe wahaicaga ngari igŭrũ akanĩrĩra mŭthenya barigici atĩ oya thirikari, ūndũ wake wa mbere nĩgŭtigĩrĩra atĩ arĩmi anyinyi na aruti wĩra, nĩo agakorwo akĩrũmbũyania na mabatarā maō. Eraga andũ atĩ mama mboga na andũ a mpokoteni, nĩo magakoragwo me hau thĩinĩ wa metha ya githiũrũrĩ magĩcirĩra mŭtũrĩre wao. Thutha wa Kũingĩra nyũmba ĩyo ĩ kĩrĩma inĩ, ndũngĩmenya nĩ atĩa gwashire na mbere tondũ amagarŭrũkire ta andũ atarĩ oona maica inĩ make.

Andũ acio arĩmi anyinyi rĩu nĩo aratunya mŭgũnda wa Kũu gwitagwo Ndabibi na ona korwo nĩ wake, na ūririkane ūria aheaga arimi anyinyi kĩrigĩrĩro, ndangĩkorwo agĩcindana nao ona mŭthenya ūmwe. Athĩni acio matũrite mŭgũnda ūcio kana nĩwao kana ti wao, nĩ magĩrĩirwo gũthiĩ na mbere gũikara kũu meetaga mŭciĩ. Ni kŭrĩ watho ugĩte atĩ mŭndũ angĩikara mŭgũnda wa mŭndũ ūngĩ mĩaka ikũmi gũthie na mbere, ena kĩhoo-to kuga ūcio nĩguo mŭciĩ wake. (na githŭngũ waatho ūcio wĩtagwo "adverse possession right")

Ona tũtagũthikĩrĩria ng'ano nyingĩ, ta cia marimũ, arĩmi acio maikarĩte kũu ndabibi matiagĩrĩirwo nĩ kũingatwo mŭgũnda ūcio. Andũ arĩa mokite thutha ūyũ makaiga atĩ nikũgũra magũrĩre nĩ maheni na onangĩkorwo meena title, nĩ cia magendo. ADC ta rŭhonge rwa thirikari nĩ yagĩrĩire kŭrũmirĩra watho ūria ugaga no mŭhaka manĩrĩre kĩndũ gioothe thirikari ĩrendia. Tũtirĩ tuona mĩgũnda ya ADC yanĩrĩirwo magathĩti inĩ, na kwoguo andũ acio maraiga atĩ magũrĩre kuma ADC, magereire njĩra ya magendo na mŭgũnda ti

wao. President Ruto, nĩ agĩrĩire akaane mŭgũnda wa Ndabibi ota ūria akanire rĩria Matiangi etirwo Parliament aheana ūtonga wake. Reke bŭrũri ūgie na kĩhoo-to na arimi acio anyinyi macokerio mŭgũnda wao -na arĩa manyitirwo marekio hatarĩ baĩni.

Uyũ nĩ ribota Njeri Wa Karago.

MWĨHOKO WA AKENYA AINGĪ NĪ PRESIDENT WILLIAM RUTO NDAKAHENIO NA IRIO CIA NDA KŪU WHITE HOUSE ENDIE BŪRŪRI.

Kŭrĩ maũndũ maingĩ magĩrĩrwo nĩ kũhinga mũthenya ũcio ta magwĩkĩra kĩrore ngĩrimiti ya ũigwithanio wa biacara (bilateral trade agreements) na ĩria ĩ bata mũũno ĩtagwo E2 treaty ya kũhingũra njĩra nĩgetha akenya no mooke bŭrŭri wa America na visa ya kĩwĩra kĩa biacara ĩtagwo EB 5 na ingĩ nyingĩ.



Andũ aingĩ matiũĩ atĩ Mũamerika nĩ endete marengye mũũno na thubu wamo, nĩmũkumie mũno kũu White House ta hĩndi ya thanksgiving

Thubu ũcio ndũkiheagwo o mũndũ woima na njĩra, tondũ nĩ wakũhenereria anene aingĩ arĩa maceraga nyũmba ĩo.

Ungĩkaigua atĩ mũnene nĩ aroka Amerika, arugagĩrwo thubu wa marengye akamba kũnyua atanekĩra kanyamũ kangĩ nda.

President Biden, kũroneka nĩ akoretwo agĩkumia President Ruto mũno, kuma mũthenya ũria aigire bŭrŭri wa Kenya, nĩ ũkũruta thigari ngiri ĩmwe ithiĩ Haiti gũteithĩria kũnina thogothogo nene ĩria ĩ bŭrŭri ũcio.

Andũ aingĩ nĩ marakarire maigua gĩiko kũu na makĩmũtwara igoti rĩria inene mabinge ũho-ro ũcio, tondũ mbara ya Haiti

yarehirwo nĩ America o ĩria ĩtendaga gũtũma thigari ciao. Riu kieha kĩnene nĩ angĩkorwo President Ruto, egũũka Amerika kũhenio nĩgetha mũamerika athiĩ na mbere kũingagĩra maũndũ ma bŭrŭri, ota ũria aingagĩra hĩndi ya ithurano. Tene Amerika yaragia ũria Kenya ĩkwenda kũgia na ũhuru wa mũkenya wotho, na nĩguo matũmire njamba yetagwo Hempstone nĩgetha yarĩrie marehemu President Moi ũria wehĩtaga atĩ ndangĩeheria section 2A- ĩria yetikĩritie o kiama kĩmwe.

America nĩ yahũthĩre ikundi nyingĩ Kenya kinya igĩtigĩra Moi nĩ ororoa, na Kenya igĩtuĩka bŭrŭri wa ciama nyingĩ. Riu kieha kĩrĩ ho nĩ atĩ Biden, ahota gũkorwo na ungumano na mawara ahũthire President Ruto na njĩra ya kũmuhaka ota ũria ngũkũ ĩkagĩrio mbembe nĩgetha inyitwo ĩtuke nyama.

William agakorwo kũu white house, kũria anene atĩku marugagĩrwo thubu wa marengye na magatururio kinya muico makaingĩra ithandũkũ(box).

Kŭrĩ maũndũ maingĩ magĩrĩrwo nĩ kũhinga mũthenya ũcio ta magwĩkĩra kĩrore ngĩrimiti ya ũigwithanio wa biacara (bilateral trade agreements) na ĩria ĩ bata mũũno ĩtagwo E2 treaty ya kũhingũra njĩra nĩgetha akenya no mooke bŭrŭri wa America na visa ya kĩwĩra kĩa biacara ĩtagwo EB 5 na ingĩ nyingĩ.

Okorwo ti maũndũ macio makahinga mũthenya ũcio, William Ruto, agacooka Kenya na mbeca igakorwo inyitanithĩtio na mawara ma gũtũma America ĩthereme Africa, na ũguo nota kũnyua thubu ũtarĩ na umithio.

Kũratũka mbere ya kũnyua thubu, nĩ agacemania na andũ a Kenya kũu Atlanta na

kũroneka nĩ gũtanya ũria angĩtahia tũbeca twa aruti wira nĩgetha gicunji kĩa mbeca iria andũ matũmaga mũciĩ cigathiĩ bengi nene ya Kenya cia kũgura bonds, na nyumba iria itoio kana nĩ irĩ umithio.

Andũ amwe maroria thirikari itigĩrĩre nĩ mathengia watho ũria wĩ constitution ya Kenya wa kũhinyĩria akenya arĩa matũkĩte aikari a mabŭrŭri ma nja(dual citizens).


Na ũndũ ũngĩ nĩ wa irihi kũingĩra Kenya wĩ mũkenya na ũrahũthĩra passport ya bŭrŭri ũria watũkĩre mũikari wakuo.

Tũgũgitanya President Ruto ndagoke Kũnyua thubu wa kwendia Kenya wiki na akĩnyue wa gũkũria bŭrŭri na ũtarĩ na njahĩrira iria ihihinyagĩrĩra andũ aingĩ mabŭrŭri ma Africa.

Karanja Njoroge.



MBIMBI CIA MWAŪRANDŪ



Karũgano kandike nĩ Ngũgĩ wa Thiong'o
Gakaganwo nĩ Ndũngi wa Gĩthuku

Rĩrĩa mwaũrandũ ambĩrĩrie
kũmĩa na kwendia mbimbi
Ũndũ ũcio nĩ wamũmakirie
Na ũkĩmũtanga ngoro mũno
Kũreikia mbimbi ta thenge?
Mũtumia wake akĩaria na Ngai
Ngaragariangaragaretangaragari
Ngururianandũkangururĩriemĩ-
guainĩ
Ngururĩriangwaciĩnithĩingĩciriyaga
Akĩyona akururĩtio nĩ kĩroori
Kĩrahũra honi gĩtegitĩthĩria
Mbiĩmbiĩmbiĩmbiĩndabiibii
Akĩgurumũka toro
Nĩ ndaguũrĩrio nĩ Ngai, akĩira
Mwaũrandũ
Harĩ ũndũ arakwĩra na mbimbi icio
Umagara ũrore kana nĩ ũgũtũnga
Kĩndũ kĩhana kana

gĩkuhĩrĩrie mbimbi
Mwaũrandũ agĩkora twana
tũgĩthaka tũkĩnaga karũĩmbo
Ndabibi ĩ ndabibi
Ng'aragu ndĩrĩ hinya
Ngara ndindi
Ndindi ndindi baĩ
baĩ baĩ Ngurume
Ngurume ngurume Thengera
Mbimbi Ndabibi,
Mwaũrandũ agĩcokera
Hĩndĩ ĩyo nĩ rĩo onire mũgũnda wa
ndabibi theri
Akĩinaina ngoro na mwĩrĩ:
Ma nĩ ngai wamuonia mũgũnda ũyũ
Agĩthiĩ kwa Borithi akĩmatwarĩra
kitu kidogo
Akĩmera Ngai nĩaramũheire
mũgũnda wa ndabibi

Borithi makĩrutũrũra arĩa matũire
mũgũndainĩ ũcio
Na makĩurangĩra:atĩ marathĩkĩra
watho wa Mwathani
Mwaũrandũ na mũtumia wake
makiĩna
Ndabibi ĩ ndabibi
Ng'aragu ndĩrĩ hinya
Ngara ndindi
Ndindi ndindi baĩ
baĩ baĩ ngurume
Ngurume ngurume thengera
Mwaũrandũ araiga
maũndũ nĩ matatu
Mathengie Thengeria thengera
Kana mathiĩ korokoro
Kana ndĩmathengie
Mũgũnda wa mbimbi nĩ wakwa





Rũgano Rwa Cũcũ wa Kĩūra



Cũcũ nĩa cũacũire akĩengeaga ikinya gwa ikinya o nginya a gĩkinya kwa mũthamaki. Na rĩrĩa akinyire na akĩra mũthamaki kĩrĩa onete, mũthamaki agĩkena mũno.

Tene tene mũno nyamũ ciothe citiarĩ na Mĩting'oe na kuoguo ni ciarĩ na thĩna mũingĩ mũno nĩ gũthumburwo nĩ tũtambi na cikarigũo ũrĩa cingika na maिता maingĩ cie tugutanagia thĩ. Thĩna wa kwaga mũting'oe waikarire gwa kahinda kanene mũno onginya mũthamaki wao akiranĩra kĩheo kwĩ nyamũ o yothe ikarehe kĩhonia kũ. Nyamũ ciothe nĩ cierutanĩire mũno nginya ingĩ cigĩkua ngoro igĩtiganĩria gũcaria kĩhonia. Cũcũ wa kũūra arĩ kĩyo mũno na nĩendete mũno kũingira nginya marima inĩ o agietha kĩhonia. Kĩūra nake arĩ mũgũtaru mũno onginya kwĩ hĩndĩ atindaga akomomete no kung'orota a tũire ang'orotaga.

Mũthenya ũmwe e ũmathi inĩ wake nĩakorire handũ harĩ na ngurunga nene mũno na akĩingira thĩinie na agĩkora kwarĩ na mũting'oe mũingĩ mũno na agikena mũno. Cũcũ nĩa cũacũire akĩengeaga ikinya gwa ikinya o nginya a gĩkinya kwa mũthamaki. Na rĩrĩa akinyire na akĩra mũthamaki kĩrĩa onete mũthamaki agĩkena mũno. Mũthamaki nĩ etanire mũcemanio mũnene mũno na akĩra nyamũ ciothe kĩhonia nĩ kĩoneku. Mũthamaki nĩ ararĩire mũthenya ũcio warũmĩrĩire ũtuĩke mũthenya wa gũthiĩ kũgayana mũting'oe iyo. Mũthenya ũyũ ũngĩ ruoro rũgĩtema nyamũ nyingĩ nĩciarահũkĩte na cikambia thabarĩ ya gũthiĩ ngurunga inĩ nĩguo

megaĩre mũting'oe iyo. Matongoretio nĩ mũthamaki wao kaihũ na gacũkũ nginya ngurunga inĩ. Nyamũ ciakinya ngurunga inĩ mũthamaki nĩa heire cũcũ wa kũūra wĩra wa gũtumĩrĩra mũting'oe thuthainĩ wa nyamũ. Nyamũ ciothe iria ciakinyite hau cikiarira raini citonyage imwe thutha wa irĩa ingĩ citongoretio nĩ mũthamaki wao. Wĩra warĩ mũnene mũno ũrĩa warutirwo nĩ cũcũ wa kũūra o nginya mũting'oe yoothe igĩthira. Kĩūra nake agĩkorwo nĩokĩra na agĩthiĩ nginya kũrĩ cũwe na agĩkora mũting'oe yothe nĩthirire nawe na mwĩro wa ngoro yake ecĩragia cũwe nĩa mũigĩire mũting'oe wake. Na rĩrĩa oririe cũwe kana nĩa mũigĩire mũting'oe cũcũ wao akĩmacokeria aca. Kĩūra nĩa

makire mũno na akĩrakara mũno. Cũcũ wao nĩ ciririe na ihenya mũno na akĩra kũūra ndakamake akĩmwĩra ũrĩa arĩkaga rĩrĩa rĩothe nyamũ icio ingĩ cirahiũria mũting'oe. Cũcũ wa kũūra akĩra kũūra rĩrĩa rĩothe mahiũria mũting'oe we nawe ũkarũgarũga na igũrũ makona ta wĩna mũting'oe. Kĩūra nĩkĩonire ũndũ ũcio wĩ mwega mũno na agĩtĩkania na cũwe. Na kuma mũthenya ũcio kũūra gĩtũraga kĩrũgaga o kiĩona kĩndũ hakuhi nakĩo. Kaĩ ũguo nĩguo kũūra kĩagire mũting'oe iĩ.

Mwandiki nĩ Joseph Kimani





Rūrĩrĩ Rūrahuka Nĩ Undũ Wa Njohi

Būrĩri inĩ wa Kenya Njohi cia ibango rĩu nĩ imakĩtie andũ aingĩ nĩ ũrĩa itete mĩciĩ mĩngi, na ikanina imwana ona kinya airĩu marĩ na ciana nyinyi.

Ūngĩcera matūra maingĩ ma Mūranga, Kiambu, Nyeri, Kĩrĩnyaga, Embu, Meru na matūra maingĩ ma Nairobi, imwana ciorĩre njohi-ini cia ibango iria ikoragwo na raithi. Mwandiki witu kũu Kenya ũrĩa ũratũkinyĩria ũhoru kuma gũcagi kĩa Ting'ang'a, aratwĩra kũu imwana ikuite mũno nĩ ũndũ wa Njohi icio.

Haria aracerete hakuhĩ na Ndumberi, hakoretwo na mathiko o mũthenya handũinĩ ha mwaka ũmwe na moothe nĩ ma imwana iria citarĩ wira. Nĩ kieha kiingĩ tondũ aciari aingĩ nĩmaremetwo nĩ gũtigithia njohi icio cikoragwo tũcorocoro tũria manyitana-gĩra na borithi.

Andũ arĩa mendagia njohi icio nĩ arĩa mena mbeca nyingĩ cia kũhaka borithi na kũmanyita, no wĩra wa burĩ.

Nĩ ũhoru ũrigithĩtie andũ aingĩ makĩria gĩtarũ gĩa ga-



mũndũ ũtaremenya nĩ ũndũ wa njohi naarorete gũkua

tagati kũria njohi iyo iingĩhite mũno.

Ūrĩa ũkĩrĩ rūhonge rwa thirikari na nĩwe Deputy President Gachagua, nĩ arageria kũnina njohi icio cia ibango, no nĩtakũhũra maĩ na ndĩrĩ.

Nĩkũrĩ na ikundi ciĩrutĩre gũthiĩ matūra marĩa njohi iyo iingĩhite, no mena thĩna tondũ ona no moragũo- nĩ mĩkora iyo inyitanĩte na macibu kinya borithi.

Undũ ũcio wa njohi icio wambĩrĩrie hĩndi ya marehemu Moi, ũrĩa ũtarĩ na mĩbango ya andũ anyinyi marĩkia thukuru

makona wĩra.

Andũ arĩa mwandiki witũ araragĩria, oothe, maregwatia wĩra na makaiga, korwo me handũ marutaga wĩra wĩ kiene, matingĩnyua njohi icio. Marutaga tũmawira tũtarĩ na mbeca nyingi, na cioothe, magaitĩrĩra njohi inĩ.

Undũ ũcio wa kũnina njohi, no thirikari ingĩhota, inyitanĩire na aciari, na mangiagithia andu acio indo iria ihũthagĩrwo kũruga njohi iyo, mahota kũmĩnina.

Ūndũ ũngĩ thirikari ingĩka, nĩ kũmatuira baĩni nene mũno,

na mũndũ aremwo kũruta, agatwarwo kũndũ angĩrutithio wira mũnene ũtarĩ irĩhi.

Njohi ndĩri baita thĩinĩ wa mwĩrĩ, tiga kũhinyĩrĩria na mũico wayo nĩ gĩkuũ.


Njohi nĩ njohi, na inyuagwo nĩ arĩa morĩte na matarĩ na kĩrigĩrĩro kĩa mūtũrĩre wao.

Tigana na njohi angikorwo nĩ ya gũkuhĩhĩria kaburi inĩ gaku.

Mwandiki nĩ Wangithi Kago maitũ wa rūraya

Njoohi nĩ njohi Ndũgatuĩke mũndũ Wa Njoohi

Irebeta rĩrĩbete nĩ Ngũgĩ wa Thiong'o



Njoohi nĩ njohi
Njoohi Yohaga kĩongo na ngoro na mwĩrĩ
Njoohi ndĩrĩ mwarimũ
Njoohi ndiũũ ũthaka
Njoohi ndiũũ mũĩrĩtu kana mwanake
Mũthuri kana mūtumia

kana mũthoniwa
Njoohi nĩ njohi na ndĩrĩ thoni
Njoohi ndiũũ ndagĩtarĩ kana Professor kana President
Njoohi nĩ njohi
Ndũkareke wohwo mwĩrĩ

ngoro na kĩongo
Nĩ njoohi njohi irĩa yohaga mũndũ akerigwo
Kimberly Avenue, CA
August 26, 2023



Kahiũ geitainwo na rwenji





MWARĪ MŪIRŪ NĪ KĪRORERWA KĪA NĖAI

Irebeta rĩa Ngũgĩ wa Thiong'o

21 July 2020

Ndandĩkire Irebeta rĩrĩ, MWARĪ MŪIRŪ NĪ KĪRORERWA KĪA NĖAI, mweri wa Mũgwanja, 2020, Karĩbonia, gũkumia ũthaka wa mũndũ mũirũ. Ihinda rĩrĩ tũrĩ, o hamwe na gũkomererio nĩ Corona, Andũ airũ nĩ makomereirio nĩ rũthũro rwa gĩkonde kũirũ. Rũthũro na ũthutũkanio ũcio umanĩte na hĩndĩ ya ũkombo na hĩndĩ ya ũkoronia. Twakaga, angĩ makainĩra nyũmba twakĩre; Tũkarĩma, angĩ makagetha. Ta gũkũ USA, andũ airũ, arĩa hinya wao wakĩre bũrũri ũyũ, nĩ marooragwo, na matũire moragagwo, nĩ ũndũ wa gĩkonde kĩa kũirũ. Ngakĩuga tũtingĩkĩhũrwo na ithuĩ twĩhũre; tũnyararwo, na ithuĩ twĩnyarare kana gũkobia gĩkonde kĩa arĩa maratũnyararĩra giitũ. Nĩ twĩkumie na ũirũ witũ, tũrũgamũire igai ritũ, rĩ rĩa tũri na mwĩrĩ, na rĩ rĩa maciaro ma moũo na meciria Maitũ.



Njuĩrĩ yake ĩruraga ũirũ ĩkarĩrũka marĩrũ
Amĩoha makundo,
Mũmwĩroreri akerĩrĩria ikundo rĩa
ũirũ ũyũ anyotoke.
Amĩrama mĩhari,
Mwĩroreri arenda kũgereria twara
tũcĩrainĩ gatagatiĩni ka mĩhari ĩyo.
Amĩthondeka kĩ-afro, ĩgatuĩka
thũmbĩ ya ũthaka.
Agĩkinyũka na gũkinyũkia
Mũndũ arenda gũkinyũkania nake;
Acũacũa,
Mũndũ arenda gũcũacũania nake.
Ainamĩrĩra kwĩrorera ihũa
Mũndũ arenda kũrĩnamĩrĩra
arĩkie ritho.
Reke Nyarari ĩno yenge igego,
Ūtheri warĩo ũkagegearia mũndũ
O nake akenga igego.
Uma mũrakaru
Akarakarũkwo
Uma na ihooru

Akahoohũkwo
Uma na kĩaha
Gĩkamweherera.
No Nyarari ĩno ti ya gũthakĩrwo
o ũguo ta kĩbica,
Kana kũnyamario hakiri na ciugo
kana mwĩrĩ na ciiko.
Nyarari ĩno nĩ yũĩ gwĩtetera
na ciugo:
No ciake ciumaga rũrĩmĩĩnĩ rwake
ĩrĩ thime.
Nyarari ĩno nĩ yũĩ kwĩgitĩra
na ciiko:
Amu nĩ njorua ya ngundi na ndeke.
Wee!
Nyarari ĩno ti ya gũtangatangagwo
nĩ takataka wa ũtarĩ na thoni kana
gĩtiyo.
Mĩhutie na matharau, ĩgũtũma
wone njata mũthenya barigici, amu
Nĩ yamenyire o tene kwĩyũrĩria na
kanua,


Na kwĩgitĩra na moko.
Wee!
Yugaga ũtumia ti gũtumia kana
gũtumĩrĩria mathĩnĩkio.
Mũgambo wa Nyarari ĩno Nyakairũ
Ūinagia rwĩmbo ngoroinĩ ya
mũmĩthikĩrĩria.
Ngoro ĩyo ĩgatumatuuma
ĩgatherũka gĩkeno,
Rũrĩmĩ rwa mũthikĩrĩria naruo
rũgatumũka rwĩmbo rwa
Gũkumia Ūthaka wa Muoyo.
Wee
mwarĩ wa njata na mweri na
Ra-Riũa
Tiga kũhumbĩra riiri waku
Wee
Riiri waku ti wa kwĩrirwo nĩ wa
kwĩrĩrĩrio
Mwarĩ mũirũ nĩ kĩrorerwa kĩa Ngai.

Caci Ya ACK Kiangīma ĩcokerie Dauglas Wanyanga Mūgūnda Wake

NĪ KŪRĪ WATHO UGĪTE ATĪ MŪNDŪ ANGĪKARA MŪGŪNDA WA MŪNDŪ ŪNGĪ MĪAKA IKŪMI GŪTHIE NA MBERE, ENA KĪHOOTO KUGA ŪCIO NĪGUO MŪCĪI WAKE. (NA GITHŪNGŪ WAATHO ŪCIO WĪTAGWO "ADVERSE POSSESSION RIGHT")



Wanyanga meena mūtumia wake



Andū mahana ta itoi arīa caci ĩratūmite mamomore nyūmba ya Wanyanga

Tūrī ithuoothe kuma gūkū **mūgambo** wa **kīrinya-ga** handū ha Dauglas Wanyanga, nītworia na gītīyo, caci ya ACK Kiangīma, ĩcokie mūgūnda wa Wanyanga ona angīkorwo nīmagūrīte.

Mūgūnda to ūcio tondū kwīna mīgūnda mīingī ĩrendio Mūranga, na mīingī yayo, ndīrī na thogothogo.

Cokeriai mūrīmi ūcio mūnyinyi mūgūnda wake tondū hau niho akūrīire na nīgetha akīrīmagīre mbīrīra ya arīa mamūcia-

rīre o agīethagīra ciana ciake irio. icio mūrāingata no iria ciana cia ciana ciao ikarūmīrīa caci o iyo.

Kwīna ikundi nyingī cingīrutīra, na icokie mbe-ca cianyu iria mwahere atunyani a mīgūnda ona okorwo marī a family ya Wanyanga.

Wanyanga ena ciana iria irenda gūkorwo na handū marītaga mūcīi. Kamau wa Gichūki nī ar-amūrīa na gītīo mūtīka-īngate Wanyanga na nīkīo arethumbūra na gūcaria ikundi cia kūrūrīa kīhoto

kia mūthuri ūcio mūkūrū. Mahītia nī marekanagīrwo ota ūrīa caci nyingī ihunja-gia na nīyo yagīrīire kūrora kīhoto handū ha gūcin-dana na arīa matarehota ona matarī na handū ha gūthīi.

Rekei caci ĩtuīke kīonere-ria gīa kwīra atunyani a mīgūnda matige waganu ūcio wī būrūrī woothe, handū ha kūnyitanīra nao. Andū metīkītīe atī, caci nīyo njīra ya kuona kīrīgīrīro kīa muoyo wa tene na tene, na reke gūtūre ūguo mīndī, na mīndī.

Nītūgūikara tūkīandīkaga ūhoro wa Wanyanga kin-ya rīrīa kīhooito gīkoneka-na tondū twīna mwihoko nīgīkuoneka.

Tigai gūtūira Wanyanga ūūru tondū nī atururītio nī arīa mangīarīrīria kīhoto gīake nī ūndū wa unguma-nio munene ūrīa wī būrūrī woothe.

Kīhooito nī gīkorwo nīkīo gīgūtongoria, nīgetha andū oothe maigue maiganīire.

**Mwandīki nī
Njeri wa Karago.**

Mũtĩ wa mũgumo nĩ wa kũrutĩra magongona

Agĩkũyũ metĩkĩtie atĩ gĩtinainĩ kĩa mũtĩ wa mũgumo nĩho Maũndũ matheru marũtagĩrwo

gĩai na
ũrũmwe
wĩna
mwerekero

Thaai thathaiya ngai thaai
Thaai thathaiya ngai thaai
Thaai thathaiya ngai thaai
Mũgĩkũyũ ambagĩrĩria mahoya ũguo
kũrogĩa thayũ bũrũri woothe
na rũrĩrĩ rũtikahuke

Agĩkũyũ metĩkĩtie atĩ mũtĩ wa mũgumo warĩ ũrĩa magomanaga hau gĩtina rĩrĩa mekwenda kwaria na ngai, na nĩguo athuri aria marĩ atongoria a magongona, mahoyagĩra gĩtina kiagũo.

Mutĩ ũcio warĩ mwĩtigĩre mũno na ndũngĩainire ngũ ciagũo. Athurii mathĩnjagĩra mbũri cia magongona hau gĩtina kĩa mũtĩ

ũcio na magetĩkia ona ngai nĩ akoragwo akĩrorera kana enao makĩruta magongona mao.

Kwarĩ kieha kiingĩ mũtĩ ucio ũngĩomire nanĩmageragĩa ũrĩa mangĩhota kũũtira.

No mũgumo ũkoragwo na mĩri mũingĩ mũno irũmĩte tĩri na hinya mũingĩ ta ũrĩa andũ manyitanĩire me hamwe matenyenyekaga

Nĩ kwarĩ na mũtĩ ũcio kũu Thika na Mũgo wa Kibirũ nĩ arathĩte atĩ rĩrĩa mũgumo ũcio ũkoma nĩguo athũngũ makaima bũrũri wa Kenya.

Kwĩrikanaga atĩ athũngũ nĩ mageririe mũũno kũwakĩra mahiga mathiũrũrũkiirie hau gĩtina na no wagũire na wathani wa nyakerũ ũgĩthira

Mwandĩki nĩ Gĩtaũ Wakanyua

E-MAIL

diasporatimeskenya@gmail.



diasporatimeskenya@gmail.



Andĩkĩri Mũgambo Wa Kĩrinyaga.

Marũa Kũrĩ Mwandĩki

email-diasporatimeskenya@gmail.com



Mītugo ya agĩkũyũ_{mitu}




Arch Dr. D.K. GITAU

Gitaũ



Ngũgĩ

Prof. Ngũgĩ wa Thiong'o




ino niyo ngatheti ya Mũgĩkũyũ




Wangithi wa



Ndũngi Githuku





Kinyanina52@gmail.com



Mũirĩtu mũnyinyi njorua



LEMFI

International Payments
For **Everyone**

Send and receive money from Kenya



Zero transfer fees

Best rates

Quick transfers

Send directly to MPESA and bank accounts

Receive money from Kenya

Get \$30 cashback the first time you send \$100 or more*

Use the referral code

TIMES

*Terms and conditions apply



Scan to download



CLICK HERE

GET IT ON
Google Play

Download on the
App Store

Send money to



f @uselemfi

t @uselemfi

W: www.lemfi.com

E: support@lemfi.com

Remittance services sponsored by Community Federal Savings Bank.



Wĩnyitĩre ndahana ũtarĩ ona gatũũ

